

Nunani allani ilisimatusarfiit suleqatigalugit Ilisimatusarfimmi ilisimatusarfigineqarsinnaasut saniatigut interneti atorlugu ungasianiit ilisimatusartoqarsinnaanera pillugu Naalakkersuisut misissueqqullugit peqquneqarnissaannut aalajangiiffigisassatut Inatsisartunut siunnersuut

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISSUTAA

Aalajangiiffigisassatut siunnersuutip aappassaaneernejarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq kingullermik suliarinninnermini ukuninnga inuttaqarpoq:

Harald Bianco, Inuit Ataqtigiit
Debora Kleist, Inuit Ataqtigiit
Andreas Uldum, Demokraatit
Malik Berthelsen, Siumut
Knud Kristiansen, Atassut

Siunnersuut UPA 10-mi ulloq 29. april siullermeernejareemat Kultureqarnermut,
Ilinniartitaanermut, Ilisimatusarnermut Ilageeqarnermullu Ataatsimiititaliamit
misissorneqarpoq.

Siunnersuutip imarisai

Internet aqutigalugu nunani allani ilisimatusarfinni ilinniartitsinermik malinnaanissamut
Ilisimatusarfiup ilinniartuminut annertunerusumik neqerooruteqarsinnaanera
misissorneqassasoq siunnersuuteqartup siunnersuutini aqutigalugu kissaatigaa.
Erseqqissumik allassimangikkaluarluni siunnersuummi ilaatinneqarpoq nunani allani
ilinniarneq assigalugu ilinniartut soraarummeersinnaanissaat aammalu
ilinniartitsissutigineqartup ilinniartitaanerup ilaatut akuerineqarsinnaanissaa.

Aammattaaq siunnersuuteqartoq allappoq:

”Taamaattumik nunarsuarimi ilisimatusarfittut tatiginarluartutut siunissami Ilimmarfiup tusaamasanaanera inissisimarngalu qulakkeerumallugu pingaartorujussuuvoq, ilisimatusartut amerlanerusunik periarfissinneqarnissaat. Siunnersuut akuersissutigineqassappat ilisimatusartut ilisimatusarfinni allani faginut allaanerusunut unaminarnerusunullu malinnaasinnaalissapput. Tamanna pinngitsoorani Kalaallit Nunaannut iluaqusiisussaavoq tangilimmik. Qaavatigut ilinniagassat amerlanerit pissaganartut pissarsiarineqarsinnaapput nunagisaq qimannikkaluarlugu”.

Siunnersuutip aningaasatigut kingunerisassai

IT-mi atortunut aningaasaliissuteqarnissamik siunnersuut kinguneqassasoq siunnersuuteqartoq allappoq. Nangillunili allappoq:

”Siunnersuulli pivisunngortinneqarsinnaappat tamanna naggataatigut Ilimmarfimmuut sipaarutaasussaavoq, ilinniarnert immikkoortuisa nutaat aallartilerneri tamarluinnaasa ilungersortoqartaqimmat ilinniartitsissarsiorluni kiisalu nunarsuup sinnerani ilinniakkat qaffasissut assigiinngitsut tunngavigalugit ilinniagassanik pilersaarusiortoqartarmat. Aaqqiissutit akisuut danskit ilisimatusarfianneersunik, ineqartussanik angalasussanillu Namminersorlutik Oqartussat akiligaannik, ilinniartitsisunik attartorluni ingerlanneqartartut sipaarfigineqarsinnaanngussapput”.

Siunnersuutip aningaasaqarnermut tunngasortai Naalakkersuisut akissuteqaamminni tikinngilaat.

Ataatsimiititaliap siunnersuummik suliarinninera

Siunnersuut partiinit tamanit tapersorsorneqartoq aammalu siunnersuut akuersarneqassasoq Naalakkersuisut inassutigigaat ataatsimiititaliamit maluginiarneqarpoq.

Ilinniartitsissutinik nunani allani ilisimatusarfinni ingerlanneqartunik internet aqutugalugu malinnaasinnaanissaq iluaqutissartaqartoq ataatsimiititaliap takusinnaavaa. Internet aqutugalugu ungasianit ilinniartitsineq nunani allani assut atugaasoq tamatigulli nunat ataasiakkaat iluanni pisartoq ataatsimiititaliap ilisimavaa.

Ilisimatusarfinnit avataaneersunit tikisitsilluni oqalugiariartortitsisarnerit ilinniartitsiartortoqartarneraluunniit ilisimatusarfinni nalinginnaasoq ataatsimiititaliap erseqqissarumavaa. Tamanna aaqqiiniutitut atornerqarnej ajorpoq, tassaallunili ilisimatusarfeqarnermi ileqqutut atornerqartoq. Ineriartortuarnissamat ilisimasanik avitseqatigiittarneq pisariaqartutut isigalugu minnerunngitsumillu ilisimatusarnerup pitsaanerpaaffimminiinnissaa qulakkeerumallugu ileqqoq taanna ukiuni untritolikkaani atuussimavoq.

Internet aqutugalugu nunani allani ilisimatusarfiit suleqatiginissaannut ullumikkut periarfissat ilisimatusarfimmit misissorneqassasut Naalakkersuisut paasissutissiissutigigaat

ataatsimiititaliamit maluginiarneqarpoq. Ilisimatusarfiup misissuinerata inerneru pillugit ilisimatitsissummik Naalakkersuisunit nassinneqarnissani ataatsimiititaliap qilanaaraa.

Inassuteqaatit

Oqaaseqaatit siuliani allassimasut aammalu siunnersuutip siullermeerneqarnerani oqaaseqaatit tunngavigalugit **ataatsimiititaliap isumaqatigiittup** siunnersuut akuersissutigineqassasoq inassutigaa.

Taama oqaaseqarluni ataatsimiititaliap siunnersuut aappassaaniigassanngortippaa.

Harald Bianco

Debora Kleist

Andreas Uldum

Malik Berthelsen

Knud Kristiansen